

北斗七星念誦儀軌

南天竺國三藏金剛智譯

爾時如來為末世薄福眾生故，說真言教法。時一切日月星宿，皆悉雲集，前後圍繞，異口同音白佛言：唯願如來為我等說於神呪。爾時世尊即說北斗七星呪曰：

唵(引)颯鉢路(二合)孺(引)底囉伽(二合)拏野伴惹(引)嚩伽囉(二合)訶尾惹殷普(引)唎娑他(二合引)麼娑嚩(二合)惹那囉乞釤(二合)婆嚩都娑嚩(二合引)訶(引)

Oṃ, sapta jyotir-gaṇaya bhañja ava-graha, vi-jayin bhūri sthāma sva-jana rakṣaṃ bhavatu svāhā.

北斗七星印：左右二火、二空相係捻之，二水合指前面，二地二風張立即成印（出阿陀蜜經或在口訣云云）

佛告貪狼破軍等言：若有善男子、善女人，受持是神呪者，汝等擁護否？爾時七宿白世尊言：若有人每日誦此神呪，決定罪業皆悉除滅，成就一切願求。若復有人，能每日誦此神呪一百八遍，自身及一切眷屬即獲擁護。若能誦五百遍，一切日月七宿，五百由旬內，普皆圍繞，大威神力常作擁護，一切魔王及諸魔眾，一切障者，及諸惡鬼，不敢靠近；諸天龍藥叉作障難者一時斷壞。若人欲供養七星宿者，先發拔濟心，於清淨寂靜之處，以香華飲食供養，持念神呪及結印契。如是供養時，七宿現身隨意奉仕，成就無量願求，羅惹位猶可得，何況世間少少官位榮耀；若求延壽，削定業籍，還付生籍。若諸國王、王子、大臣、後宮等，於自宮中作曼荼羅，如法護摩，禮拜供養，北斗七星皆大歡喜，國王得久居勝位，恒受安樂，百官上下和睦，不行非法，人民熾盛，稼穡豐饒，國土安寧，無有災難，不現異怪，疫病死亡不起，境內怨敵群賊自然退散。以是法甚為祕密故，不信者及無智人中勿妄言說，無智人心智晦暗，不得法意，即生毀謗，然其所生子等如常誦持佛眼母明者當可為其宣說，因彼等不生疑謗故法即得成就。修是法者如得世間福樂，亦應迴向無上正等菩提。

【經文資訊】大正新脩大藏經第 21 冊 No. 1305 北斗七星念誦儀軌

【版本記錄】CBETA 電子佛典 Rev. 1.7 (Big5)，完成日期：2006/04/12

【編輯說明】本資料庫由中華電子佛典協會（CBETA）依大正新脩大藏經所編輯

【原始資料】蕭鎮國大德提供，北美某大德提供

【其他事項】本資料庫可自由免費流通，詳細內容請參閱【中華電子佛典協會版權宣告】

公元二零一四年七月五日馬來西亞萬撓佛教會蔡文端修正及更新咒語。